

Eir forza electrica es ün prodot da marchà

A San Murezzan ha cumanzà la prüma «Green power marketing conferenze» da l'Europa

■ (ht) In marcurdi saira ha cumanzà la prüma conferenza da strategias per vender forza electrica chi vain prodotta da maniera plü ecologica. In vista a la liberalisaziun dal marchà d'energia es quai dvantà ün tema fich actual chi'd ha attrat 170 experts da vendita e da la politica d'energia ecologica da 20 pajais da l'Europa. Els han l'occurasiun da visitar dürant duos dis referats davart la materia e da discuter e brattar infuormaziuns. Il fat cha quista conferenza ha lö güst a San Murezzan, sta in connex cun quai cha la Rätia Energie ha creà üna marca da «forza ecologica» cul nom San Murezzan.

Forza electrica da marca eir sül marchà svizzer

In occasiun da l'avertüra da la conferenza han il manader da quella, *Bernd Kiefer*, ils rapreschantants da las ouvras electricas e l'expert da l'Università da San Galla per quel tema, *Rolf Wüstenhagen*, declarà perche chi fa insomma dabsögn d'üna tala conferenza e qual chi sarà il svilup da la forza electrica per l'avegnir. Quai chi'd es eir ün motiv cha la conferenza es uschè bain visitada.

In diversas parts da l'Europa es il marchà d'energia electrica fingià gnü liberalisà cumplettamaing. Eir in Svizra dess quai capitar pass per pass. Üna vouta cha'l marchà es liber nun es forza electrica plü simplamaing forza electrica. D'üna vart sun ils predschs chi dictan il marchà e da l'otra vart dvainta la «marca» ün tema fich important e per diversas spartas da l'industria da produenziun da la forza electrica eir ün tema existenzial.

Cliants chi mettan pajs sül fat da na cumprar be l'energia la plü bunmarchada sainza tour resguard sül ambiaint

e sül avegnir dal muond e da l'umanità, cumpraran in avegnir la forza la plü favuraivla. Quai sarà la gronda part dals cliants. La forza la plü favuraivla vain però prodotta in ouvras electricas atomaras ed in ouvras electricas da charbun. Tuottas duos metodas da produenziun d'energia electrica sun e restan donnagiaivlas per l'ambiaint. In Europa sun las ouvras electricas chi han metodas da produenziun ecologicamaing plü favuraivlas, illa minorità. Be 13 per-

tschient da la produenziun da la forza electrica vain fatta cun agüd da funtanias d'energia regenerablas. Quai sun per 11 pertschient ouvras idraulicas ed il rest ouvras fotovoltaicas chi tiran a nüz l'energia da sulai. Quistas metodas da produenziun sun però plü charas e l'energia ecologicamaing plü favuraivla nun ha la schanza da concuorrer sün ün marchà liber cun otra energia chi'd ha predschs plü favuraivels. Perquai dovra «marcas» e «labels» eir per l'energia electrica.

Las ouvras idraulicas dvaintan «verdas»


Las ouvras idraulicas pon gnir congualadas culs pajs bio. La produenziun agricola in regiuns da muntogna es plü chara ed ils pajs ston far valair la qualità da lur prodots (plü chars) sch'els voutan avair üna schanza sül marchà. Perquai s'han biers d'els decis per la produenziun da maniera biologica. Eir las ouvras idraulicas han cuosts da produenziun massa ots per pudair concuor-

rer sün ün marchà liber. Dimena ston eir ellas far valair la qualità da lur prodots. Quai ha chaschunà il fat cha las ouvras idraulicas dvaintan uossa «verdas». Fingià daspö ün pèr ons as poja cumprar da singulas ouvras «forza solara» per ün predsch plü ot, ma culla

garanzia cha quella es gnüda prodotta illa metoda chi'd es ecologicamaing la plü favuraivla. La forza electrica prodotta in ouvras idraulicas vain uossa missa sül seguond s-chalin da la qualità ecologica. Ed eir quella dess pudair gnir vendüda per predschs plü ots o almain sgüra cun ün meglder nom da qualità.

Eir pro'ls pajs es per part dvantà necessari ün pensar plü ecologic ed els han imprais a stimar meglder las valüors natüralas. Uschè capita quai uossa eir pro las ouvras electricas. Scha pro progets da fabrica o da renovaziun dad ouvras electricas as dispittavan quellas amo avant pacs ons culs «verds», schi hoz mettan las ouvras svesch fich bier pais sül aspet ecologic da lur ouvras da produenziun. Uschè ha declarà eir il directur da la «Rätia Energie», *Karl Heinz*, cha sia impraisa metta uossa il pais sülla qualità e na plü be sül predsch. Tanter oter ha el dit cha sia impraisa prouva da gnir libra da tuot las partecipaziuns ad ouvras atomaras e vögla in avegnir be plü amo as concentrar sülla produenziun e la vendita dad energia d'üna buna qualità ecologica.

Daspö cha eir la forza electrica es ün prodot chi po avair üna megldra o eir üna mendra qualità, dvainta naturalmaing eir il marketing per quella d'importanza ed in quel sen dvaintan automaticamaing eir necessarias talas conferenzas sco quella chi'd ha lö actualmaing a San Murezzan.



Las obras idraulicas han chattà il sen per l'ecologia.